

適園叢書

張宗祥



通國書舍



張氏藏

汪氏珊瑚網法書題跋卷九

趙子昂諸賢天冠山題詠

龍口巖

峭石立四壁寒泉飛兩龍人閒苦炎熱仙山已秋風

洗藥池

真人棲隱處洗藥有清池金丹要沐浴玉水自生肥

鍊丹井

丹成神仙去井冽寒泉食甘美無比倫華池生玉液

長廊巖

修巖如長廊下有流泉注山中古仙人步月自來去

金沙磧

攀蘿緣石磴步上金沙嶺露下色熒熒月生光炯炯

昇仙臺

仙臺高幾許時時覆雲氣一去三千年令人每翹企

逍遙巖

茲巖足逍遙下可坐百人豈徒木石居直與猿鶴鄰

靈湫

靈湫不受污深淺何足計小憩松竹鳴蕭蕭山雨至

寒月泉

我嘗游惠山泉味勝牛乳夢想寒月泉攜茶就泉煮

玉簾泉

飛泉如玉簾直下數千尺新月橫簾鉤遙遙挂空碧

長生池

竹實鳳將至水清魚自行著我艸亭裏危坐學長生

道人巖

道士本避世問之無姓字如何千載後石室有人至

雷公巖

雷公起臥龍爲國作霖雨飛電掣金蛇其誰敢予侮

石人峰

巨靈長亘天何時化爲石特立于萬年終古無人識

學堂巖

仙人非疑人山中猶讀書嗟我廢學久聞此一長吁

老人峰

有石象老人宛然如繪素稽首禮南極蒼蒼在煙霧

月巖

月巖如偃月風泉灑晴雪仙境在人閒眞成兩奇絕

鳳山

山雞愛毛羽飲啄琪樹閒照影寒潭靜翔集落花閒

仙足巖

窈窕石室閒中有仙人躅說與牧羊兒慎勿傷我足

鬼谷巖

鬼谷巖前石唐文字字奇何當拂蒼蘚細讀老君碑

風洞

石壁何空洞中有風泠然安知列御寇不向此中仙

釣臺

仙人非有求坐石視投釣咄哉羊裘翁同名不同調

磔潭

神龍或潛淵石洞通水府勿遣兒曹劇飛空作雷雨

馨香巖

山險通鳥道水深有蛟龍誰言仙樂鳴高人方耳聾

三山石

我有泉石癖甚愛山中居何當從郡公講學讀吾書

五面石

洞中卽仙境洞口是桃源何殊武陵路雞犬自成邨

小隱巖

林藪未爲隱山崖猶可梯終當攜家去瑤草正萋萋

一綫天

醯雞舞甕中井蛙居坎底莫作一綫看開眼九萬里

道士祝丹陽示余天冠山圖求賦詩將刻石山中爲作廿

八首延祐二年六月廿四日松雪道人

小隱崖

山鬼小兒足木精游女神據會學眞隱下視飛花塵

馨香崖

深睡失明珠猛走飛流涎松花卷輕雨滴滴百重泉

學堂崖

露盤下金薤雲笈流珠纓泠泠寒崖下猶有嬰兒聲

鬼谷崖

縱橫太古石短長千歲藤感彼崖居子獨飲古澗冰

昇仙臺

寥寥入太清金門繚紫垣或云有宮府微誦五千言

釣臺

垂綸落澄潭小魚儻然來大魚引之去釣石何崔嵬

一綫天

茲山可容天舉世皆笑之我不答此語鼓腹支其頤

五面石

分一只成五五石各有一誰能據其上面面不相失

寒月泉

曉汲寒泉清明月各在缶缶空不見月引水復在手

金沙嶺

金沙雖爲貴履之傷我足媿彼側布人欲獲無量福

長生池

飲冰人已去山中多白頭青蘋空淺處時見玉蟾浮

老人峰

高帽側整整秀嶺深重重積此太古雪遂名老人峰

三山石

三山不可度絕壁峙書堂流水日浩浩太極彌茫茫

磔潭

沈沈無底谷尖尖太古雲赤日焦下土老蛟眠不聞

玉簾泉

截玉作明簾不知簾外事應有碧眼仙隔簾見人至

石人峰

食玉未得法變形成楚囚九轉乞換骨三沐期點頭

仙足巖

山深猿狖驚瞬息下神步空飛本無蹤長嘯上天去

月巖

顧免樂嬉遨入地不得騁化爲白玉泉彷彿返東井

雷公巖

神釣起空洞陰火生羽翰我耳杳不聞白雲在天冠

道人巖

道人本無姓對客那有言龍口逆石髓鳥跡開雲根

丹井

金鼎悶寒泉真人彌不壞年深定飛騰子夜吐光怪

洗藥池

靈根乘月吐肉芝生土肥濯以上池水千歲永不飢

鳳山

孤飛千仞岡兩翼化爲石年年春風時山花成五色

風洞

罡風轉空輪浩劫不停息此爲天地根視之杳無跡

逍遙巖

形留非自在何者爲逍遙青松在谷口白雲在山腰

龍口巖

弄月紅玻璃匿雲紫芙蓉近已厭狡獪納息玄虛中

長廊巖

飛吟起霞佩取氣躡天梯碧雲布參差纖修與巖齊

靈湫

靈龜道其前游魚殿其後歲久深自韜清夜巖下走

清容居士書

越袁
梅氏

噴薄細成霧噫嘻忽爲風孰知生死關在此呼吸中

洗藥池

隱芝生肥水飛根漱靈泉流香到人世飲者壽千年

丹井

古丹深藏井晨光發崖谷有能下取之錫以兩環玉

玉簾泉

神仙不愛寶萬古玉爲簾願遣天風約當明弄海蟾

長廊巖

細霧不溼衣落月見長影緩引步虛吟盡此秋衣冷

金沙嶺

昔蹋金沙灘今陟金沙嶺卿來瑣骨觀卽是太陽鼎

昇仙臺

絕景斷塵情寥寥入太清何須臺百尺更待羽翰生

逍遙巖

昔誦逍遙遊長憶藐姑射百世待神人瘦影落寒石

靈湫

澄空如不測爲谷廊能容沙石俱成寶龜魚總是龍

寒月泉

無盡山下泉普供山中侶各持一瓢來總得全月去

長生池

竹根飛赤鯉荷葉戲靈龜不道神仙宅長生別有池

道人巖

斷崖窮鳥道絕頂出秋晏能此高居者誰非有道人

老人峰

冠巔風披垂領雲浩浩誰峰羅兒孫獨得老人號

雷公巖

神物時時出人閒皆震驚誰知巖上看才是小兒聲

月巖

巖圍數尺雪天墮第二月豈無淩虛人飛行廣寒闕

仙足巖

失腳落人閒一往不復收遂令學步者只循行跡求

鬼谷巖

開闔雲無定從衡石作關任渠名鬼谷亦未離人閒

風洞

渾渾復浩浩刁刁仍泠泠空洞幾如許蓄此無邊聲

石人峰

何年食石髓屹立照清波如此成終古長生亦爲何

學堂巖

翩翩學仙子羣居此山顛定無書可讀姑以聲相傳

鳳山

聖神千古上風雨九疑空只有山中竹旋爲十二宮

馨香巖

潭水下深黝日星隱文章鼓雲出石氣灑雨作龍香

釣臺

危石上峯欹清風百尺垂故人恐多事莫道釣翁誰

磔潭

未始滿盈過何曾波浪興眾皆資善利此獨保無能